

10/12/1998

Biografi Dr Siti Hasmah dilancar

MERIAH ... Raja Permaisuri Agong Tuanku Najihah Tunku Besar Burhanuddin (lima dari kanan), melancarkan biografi isteri Perdana Menteri, Datin Seri Dr Siti Hasmah Mohamad Ali, pada satu majlis di sebuah hotel di ibu kota, semalam.

Biografi bergambar setebal 236 muka surat beratjuk Siti Hasmah: Citra Wanita Dua Zaman menggariskan kepintaran dan keprihatinan Dr Siti Hasmah dalam melaksanakan lima fungsi utamanya, sebagai isteri, ibu, doktor perubatan dan pemimpin masyarakat.

Ia juga menceritakan kisah hidup Dr Siti Hasmah sejak kecil, pelajar dan detik manisnya bersama suami, Datuk Seri Dr Mahathir Mohamad, serta anak-anak.

Biografi hasil projek khas Persatuan Siswazah Wanita Malaysia (PSWM) diusahakan sejak dua tahun lalu oleh lima karyawan, Prof Datuk Dr Nik Safiah Karim; Datin Azizah Mokhzani; Prof Dr Farida Habib Shah; Prof Dr Rokiah Talib; dan Norma Dali.

Turut hadir pada majlis itu Menteri Perdagangan Antarabangsa dan Industri yang juga penasihat PSWM, Datuk Seri Rafidah Aziz; Menteri Perpaduan Negara dan Pembangunan Masyarakat, Datin Paduka Zaleha Ismail dan Yang Dipertua PSWM, Datuk Asiah Abu Samah.

Asiah dalam ucapan aluannya berkata, PSWM terdorong mengusahakan projek biografi Dr Siti Hasmah bagi merakamkan sumbangan istimewa wanita perdana negara atas jasanya kepada negara dan rakyat khususnya wanita.

Katanya, biografi itu juga akan dijual dan wangnya digunakan sebagai ansuran kepada projek Kerusi Akademik Dr Siti Hasmah di Universiti Malaya yang dijangka bermula tahun depan.

Setakat ini, PSWM baru menyerahkan RM600,000 kepada Universiti Malaya.

Kursi Dr Siti Hasmah diwujudkan bagi menghormati sumbangan dan kejayaan wanita Malaysia dalam bidang pendidikan dan penyelidikan terutama sains dan teknologi, sekali gus memberi dorongan tambahan kepada wanita.

(END)